

Meeqqat atuarfianni pisortatut atorfeqartut pisortatut ilinniarsimanissaannik piumasaqaateqalernissap pitsaaqutai pitsaanngequtaalu pillugit qulaajaasumik Naalakkersuisut UKA2019-imut nassuiaammik saqqummiussinissamik peqquneqarnissaannik Inatsisartut aalajangiiffisassaattut siunnersuut.
(Inatsisartunut ilaasortaq, Sofia Geisler, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerinnineq

Naalakkersuisut Sofie Geisler, Inuit Ataqatigiit, qujaffigiumavaat Meeqqat atuarfianni pisortatut atorfeqartut pisortatut ilinniarsimanissaannik piumasaqaateqalernissap pitsaaqutai pitsaanngequtaalu pillugit qulaajaasumik nassuiaammik UKA 2019-imut saqqummiussinissamik siunnersuuteqarneranut.

Ullutsinni atuartut amerlavallaartut takusarpavut meeqqat atuarfiata kingorna ilinniakkamut ingerlaqqinngitsut. Naalakkersuisut isumaqarput ilaatigut tamanna peqquteqartoq meeqqat atuarfiata atuartut tamaasa pikkoriffinnik piginnaasanillu pisarialinnik atuarnepup ingerlanerani naammattunik peqalersittanngimmagit.

Naalakkersuisooqatigiit Naalakkersuisullu pingaartitatut suliniutigiumasaata ilagaat tassaavoq atuarfik pitsaanerusoq angusarissaarnerusorlu pilersinneqassasoq kissaatigigatsigu taamaalilluni inuusuttut amerlanerusut toqqaannartumik ilinniakkanut allagartartaarutaasinnaasunut ingerlaqqittaleqqullugit. Tassunga atatillugu ilinniartitaanikkut aqqissuusseqqinneq aallartinneqarsimavoq siunertaalluni atuarfik ilinniarfinnut ataqatigiilluarnerusoq. Ilinniartitaanermut Naalakkersuisoqarfiup suleqatigiissitani arlariinni sulineq aallartisareerpaa periarfissat piusut suunersut paasiniarneqalereerluni.

Pissutsit arlariit pequtaasarput atuartut meeqqat atuarfiannit pitsaasumik angusaqarlutik naammassisarnerinut. Ilaatigut angajoqqaat tapersersuinerat kaammattuinerallu pingaaruteqarluinnarpoq soorlu aamma ilinniartitsisut perorsaanikkut suliassatigullu ilinniarluarsimanerat taamaattoq, atuartitsineq qaffasissumik pitsaassusilik atuartut tamarmiusut piginnaasaannik pisariaqartitaannillu aallussisoq, ilinniusiat pitsaasut aamma pisortat pikkorissut.

Taamaattumik tupigisassaangilaq nunatsinni suliffeqarfinni assigiinngitsuni sulisut pisortallu suliassat ilinniakkamik kullu qaffasissunik ilimagisaqarfigineqartarnerat, suliap pitsaassusaanut pingaaruteqarmat. Tamanna aamma meeqqat atuarfiannut atuuppoq, tassanimit atuartut atuartinneqarnerminnit pissarsiaat aamma meeqqat atuarfiata atuartitsinerata pitsaassusaa soorunami sulisut ilinniakkamik killiffiannut attuumassuteqarput, tamatumunnga ilaatillugit aqutsisut pisortatut piginnaaneqassusii.

Ilisimaneqarpoq pisortatigoortumik ilinniagaqarneq pitsaaqutaasoq – tamanna aamma atuarfinni pisortat pisortatigoortumik aqutsinermi piginnaasaqarnerinut atuuppoq. Aamma ilisimaneqarpoq, ilinniarluarsimasunik piginnaasaqarluartunillu sulisussarsiorneq ajornakusoortuusoq – tamanna aamma meeqqat atuarfianni atuuppoq. Pitsaanerpaassaaq meeqqat atuarfianni pisortallu suliffeqarfiutaanni allani pisortat tamarmik suliamut tunngasumik pisortatullu ilinniagaqarpata. Tamatuma iluaqutissartai ersersinniarlugit annertunerusumik nalunaarusiornissaq pisariaqanngilaq.

Naalackersuisut isumaqarput ilinniartitsisut aamma meeqqat atuarfianni maanna siunissamilu pisortaasarumaartut ingerlaavartumik pikkorissarnissamut ilinniakkatigullu qaffassarnissamut pikkorissartarnikkut ilinniaqqittarnikkullu periarfissaqartuaannartariaqartut pingaarporlu sapinngisamik amerlanerpaat taamatut iliornissaanut pilerisaarlugillu kajumissaassallugit.

Eqqumaffigineqassaarli ajornartorsiutitaqassammat pisortatut atorfeqarniaraanni pisortatigoortumik ilinniagaqarnissaq taamaallaat meeqqat atuarfiannut atuutsinneqassapat, pisortat suliffeqarfiutaannut allanut atuutsinneqarani.

Ilassutitut ilisimatitsissutigineqarsinnaavoq, Ilinniartitsinermik Ilisimatusarfik – siunnersuuteqartup eqqaasaatut – ullumikkut atuarfinnik aqutsinermik diplomitaarniarluni ilinniagaq neqeroorutigisarmagu, aamma Ilinniartitaanermut Aqutsisoqarfiup kommunit suleqatigalugit meeqqat atuarfianni pisortatut atorfinerlaat pikkorissarnissaat neqeroorutigisarmagu.

Naalackersuisut isumaqarput meeqqat atuarfianni pisortatut atorfeqartut pisortatut ilinniarsimanissaannik piumasqaateqalernissap pitsaaqutai pitsaanngequtaalu pillugit qulaajaasumik nassuiaasioorneq, ilisimasamik nutaanik saqqummiussiffiunavianngitsoq.

Tamanna tunuliaqutaralugu siunnersuutigineqarpoq siunnersuut itigartinneqassasoq.